

IPTA lakukan saringan kesihatan pelajar mulai hari ini

# Sekat wabak di kampus

KUALA LUMPUR - Pengurusan semua institusi pengajian tinggi awam (IPTA) mula mengambil langkah mencegah penularan wabak selesema babi daripada menular di dalam kampus dengan membuat saringan kesihatan terhadap semua pelajar sesi 2009/2010 bermula hari ini.



Tumpuan mereka bukan sahaja terhadap pelajar baru dan warga asing tetapi juga para pelajar senior yang kembali menyambung pengajian.

Di Universiti Teknologi Malaysia (UTM) Skudai, Naib Canselornya, Prof. Datuk Ir. Zaini Ujang berkata, saringan kesihatan itu akan bermula hari ini dengan tumpuan kepada 3,472 pelajar tempatan serta 241 pelajar asing yang mendaftar diri.

Katanya, saringan seterusnya pada 1 dan 2 Julai ini membabitkan 3,000 pelajar pasca ijazah.

"Mereka yang gagal dalam saringan akan dihantar terus ke Hospital Sultanah Aminah (HSA)," katanya ketika dihubungi di Johor Bahru semalam.

Dalam tinjauan di kampus UTM itu semalam mendapati ada pelajar sudah menjalani pemeriksaan perubatan di Pusat Kesihatan UTM.

Naib Canselor Universiti Utara Malaysia (UUM), Tan Sri Dr. Nordin Kardi pula berkata, saringan kesihatan untuk 5,301 pelajar baru termasuk 256 rakyat asing akan dilakukan apabila mereka mendaftar diri esok.

"Saringan itu akan dilakukan oleh kakitangan Pusat Kesihatan UUM," katanya.

Naib Canselor Universiti Pendidikan Sultan Idris (UPSI), Prof. Datuk Dr. Aminah Ayob



NASIRRUDDIN YAZID

**PELAJAR** dari Sudan, Rana Attaelmula Mohammed diperiksa kakitangan Pusat Kesihatan UTM bagi mengesan demam di Skudai, Johor Bahru semalam.

pula menjelaskan, pihaknya juga telah mengatur pelan tindakan yang sama dengan pemeriksaan ke atas 5,057 pelajar baru mulai hari ini.

Universiti Teknologi Mara (UiTM) pula berhadapan dengan tugas lebih besar untuk membuat pemeriksaan kesihatan terhadap lebih 12,000 pelajar baru mereka.

Naib Canselornya, Tan Sri Dr. Ibrahim Abu Shah memberitahu, sebuah bilik operasi akan dibuka pada hari pendaftaran pelajar minggu hadapan untuk menyelaraskan urusan tersebut.

Ketua Bahagian Komunikasi Korporat, Uni-

versiti Putra Malaysia (UPM), Abdullah Arshad berkata, semua pelajar baru diwajibkan menjalani pemeriksaan kesihatan dengan sesi pertama saringan kesihatan telah dilakukan pada 22 Jun lalu.

Sementara itu, Ketua Pegawai Perubatan, Pusat Kesihatan Universiti Islam Antarabangsa Malaysia (UIAM), Dr. Dinon Mohamad, pihaknya pula akan membuat pemeriksaan ke atas lebih 2,000 pelajar baru sesi ini.

"Kami turut menyediakan bilik kuarantin untuk pelajar yang gagal dalam saringan kesihatan atau mereka yang menjadi kontak kepada pesakit," ujarnya.